

Organismo: DIRECCIÓN XERAL DE CENTROS E RECURSOS HUMANOS

Capítulo:	
Epígrafe:	
(Para cubrir no Diario Oficial de Galicia)	

SUMARIO:

RESOLUCIÓN do 20 de marzo de 2020, da Dirección Xeral de Centros e Recursos Humanos, pola que se resolve definitivamente o concurso de traslados entre persoal funcionario docente dos corpos de catedráticos e profesores de ensino secundario, escolas oficiais de idiomas, música e artes escénicas, artes plásticas e deseño, profesores técnicos de formación profesional, mestres de taller de artes plásticas e deseño, mestres, inspectores ao servizo da Administración educativa e inspectores de educación, convocado pola Orde do 8 de outubro de 2019 (*Diario Oficial de Galicia* núm.200, do 21 de outubro)

TEXTO:

Pola Orde do 8 de outubro de 2019 da Dirección Xeral de Centros e Recursos Humanos, convocouse o concurso de traslados entre persoal funcionario docente dos corpos de catedráticos e profesores de ensino secundario, escolas oficiais de idiomas, música e artes escénicas, artes plásticas e deseño, profesores técnicos de formación profesional, mestres de taller de artes plásticas e deseño, mestres, inspectores ao servizo da Administración educativa e inspectores de educación.

Consideradas as reclamacións e renuncias producidas na resolución provisional, publicadas as vacantes definitivas pola Resolución do 20 de marzo de 2020 e de conformidade co establecido na base trixésima da antedita Orde do 8 de outubro de 2019, a Dirección Xeral de Centros e Recursos Humanos,

RESOLVE:

Primeiro. Adxudicarlles destino definitivo, en virtude de concurso de traslados, ao persoal funcionario docente que figura no anexo I desta resolución, nos centros e sedes que nel se especifican.



Segundo. Declarar en situación de expectativa de destino ao persoal funcionario dos corpos docentes que se relacionan no anexo II.

Terceiro. Publicar a relación definitiva de persoas excluídas que se relacionan no anexo III, polas causas que se indican.

Cuarto. No caso de que ata o 31 de agosto deste ano resulten suprimidos postos de traballo adxudicados pola presente resolución e co obxecto de determinar cal é o profesorado afectado por dita supresión, observarase o disposto no artigo 3 do Decreto 140/2006, do 31 de agosto, polo que se determinan os criterios de perda do destino definitivo polas funcionarias e funcionarios docentes que prestan servizos nos centros educativos que impartan ensinanzas distintas das universitarias e o cómputo de antigüidade no centro en función das causas de acceso a el (DOG núm. 169, do 1 de setembro).

Tamén se poderán declarar anulados os destinos adxudicados que estean afectados pola estimación de recursos derivados desta resolución. O profesorado afectado e que participa como forzoso quedará na situación de suprimido con dereito preferente á localidade/zona en que se lle anula o posto de traballo obtido. Se participaron con carácter voluntario, adquirirán o dereito preferente á localidade e á zona na cal se lle anula o posto de traballo obtido ou en que tiña acreditado o destino definitivo, á súa elección, sempre e cando a súa resulta non fose cuberta.

Quinto. De conformidade co establecido na base trixésimo cuarta da Orde do 8 de outubro de 2019 (DOG do 21 de outubro), a toma de posesión dos novos destinos adxudicados, que se realizará na xefatura territorial correspondente, terá efectividade administrativa do 1 de setembro de 2020, polo que o cesamento nos centros anteriores expedirase con efectividade do 31 de agosto de 2020.

Non obstante, o profesorado que obtivese destino neste concurso deberá permanecer no seu centro de orixe ata que se conclúan as actividades imprescindibles previstas para a finalización do curso.



Sexto. Ao persoal funcionario docente dos corpos de catedráticos, inspectores, profesores ou mestres que obteñan destino desde a situación de persoal suprimido ou desprazado ou exercendo o dereito de retorno, faráselle constar esta circunstancia na dilixencia de toma de posesión.

Sétimo. Contra esta resolución, que pon fin á vía administrativa, as persoas interesadas poderán formular, con carácter potestativo, un recurso de reposición ante o director xeral de Centros e Recursos Humanos no prazo dun mes contado a partir do día seguinte ao da súa publicación no Diario Oficial de Galicia, segundo o disposto nos artigos 123 e 124 da Lei 39/2015, do 1 de outubro, do procedemento administrativo común das administracións públicas, ou directamente un recurso contencioso-administrativo no prazo de dous meses ante o xulgado do contencioso-administrativo que sexa competente, de acordo co establecido nos artigos 8, 14 e 46 da Lei 29/1998, do 13 de xullo, reguladora da xurisdición contencioso-administrativa.

Porén, segundo o establecido na disposición adicional terceira do Real Decreto 463/2020, do 14 de marzo, polo que se declara o estado de alarma para a xestión da situación da crise sanitaria ocasionada polo COVID-19 e no apartado sétimo do Acordo do Centro de Coordinación Operativa Cecop), mediante o que se adoptan medidas preventivas en lugares de traballo do sector público autonómico como consecuencia da evolución epidemiolóxica do coronavirus, o prazo para a presentación dos anteditos recursos iniciarase, se fose o caso, no momento en que perda vixencia o acordo ou, se é o caso, as prórrogas deste.

Asinado electronicamente en Santiago de Compostela

José Manuel Pinal Rodríguez

Director xeral de Centros e Recursos Humanos

Insírase no DOG

Jesús Oitavén Barcala

Secretario xeral técnico

